

四庫全書

集部

欽定四庫全書

集部

忠肅集卷中

詳校官庶吉士臣陳若霖  
侍讀臣孫球覆勘

總校官知縣臣繆 琦

校對官中書臣李 奕

謄錄監生臣奎培基

欽定四庫全書

忠肅集卷中

宋 傅察 撰

啓

賀太宰啓

伏審命出中宸名登上袞千齡遇注帝意以彌深九  
天臚傳浹民情而共慶恭惟驩慶竊以文昌之職庶政  
實為喉舌之司僕射之長百僚時迺腹心之寄粵聖神

之御宇酌古昔以經邦肇新相府之聯增峻台躋之望  
官不必備久虛位以詳延道之將興宜異才之間出伏  
惟某官學窮精進識探幾微下筆屬文煥發羣言之蘊  
圖事揆策規恢億載之基進陪熙洽之辰徧歷高華之  
選周旋三省密勿九年稽前聖之典謨益見大儒之效  
練本朝之制度獨高舊德之施逮此疇咨果膺爰立普  
蕭曹漢之賢相務清淨以寧其民若房杜唐之良臣亦  
彌縫而藏諸用佞性斯道以福吾人則名譽垂於無窮

而奸邪為之不起曾是庸虛之質夙叨庇賴之私三后  
協心尚覲逆衡之治百官承式願輸僕志之勤

賀尚書右丞啓

伏審顯奉殊恩入參大政側聞渙號俯慰輿情惟上聖  
之端臨當英豪之並進左右輔弼如衆星之拱北辰上  
下歡欣若巨魚之縱大壑迺眷文昌之重寄尤資樞憲  
之得人擴帝紘而恢皇綱彌綸於政本謀王體而斷國  
論斟酌於化原自非名儒曷膺茂典某官稟淳明直亮

之德賦瑰偉博辨之才窮六藝之淵源臻乎道奧漱百家之腴潤驅於筆端出逢熙洽之辰荐被高華之選紬書冊府削草諫垣瑣闈雍容雅有違天之力霜臺慷慨凜然憂國之風旋躋內相之榮俄易地官之長雖藉孔叡之心計復思嚴樂之筆精逮再直於禁林遄獨承於淵旨令聞令望為多士之表儀嘉謀嘉猷作本朝之龜鑑果茲超拜允協僉俞元首嘉股肱之良大厦得棟梁之助方將與肆夔稷契共成堯舜之功豈特俾魏杜戴

劉固專唐室之美益昭賢業永輔明時某嘗辱袞褒屬  
茲匏繫庇身有地始知廈屋之軒幪播物無垠願預大  
鈞之抉九其如欣躍實倍等倫

賀戶部尚書啓

伏審趣領召節誕布除書任劇六曹實總萬方之計位  
隆八座密毗二府之聯凡在見聞率同鼓舞恭惟某官  
學窮宏奧識洞幾微以慷慨憂國之心蚤膺簡任以經  
綸佐時之略茂著猷為才無大而不周事雖難而必濟

自播學官之譽旋躋郎省之華出總使權最善朔方之政入持荷橐尤高省戶之功粵陞秘殿之隆遂畀帥垣之重報三月之政果膺側席之恩賜十行之書亟奉朝廷之對迺眷地官之長允資心計之優必使不益賦而用饒庶幾有餘財而頌作然後入登於近弼蓋將永輔於休辰輿頌所期斯言可必某稟生至陋蒙眷甚深雖噓枯吹生每借揄揚之賜而搃枯磨鈍難追英俊之游側聆出綽之音猶動彈冠之喜青蠅之飛數步敢忘意

於絕羣鷁鶴之巢一枝願永依於餘蔭

賀內翰賓客啓

伏審參謀猷於內相密承當寧之知職調護於東朝榮  
被出綸之命傳聞四遠欣愜一詞恭惟睿聖之臨朝願  
隆國棟迺眷元良之貳體肇建皇儲淵乎鶴禁之嚴倬  
彼龍樓之奧入有師而出有傳謹擇於宮僚見正事而  
聞正言尤資於友益是以取象於四皓予以增光於重  
離宜得真賢來膺茂典伏以其官圭璋挺器杞梓呈材

奧學鈞深窮淵源於子夏高標映世瞻模楷於李膺久持荷橐之華荐直鑾坡之秘載頌睿渥入備東賓陳賈誼之言固欲輔成於道德草王褒之詔豈惟娛侍於文辭某夙荷殊私久依大庇望風引領徒勤燕賀之情承顏接詞莫遂鳬趨之願其如欣頌實倍等夷

賀舍人詹事啓

伏審鳳閣清華密簡淵衷之眷龍樓奧秘榮兼端尹之崇遐邇傳聞士夫欣頌永惟建國之本孰先主器之良

雖岐嶷挺乎生知而溫文資乎幼學欲明道術智誼之  
指日就而月將必擇左右前後之人繩愆而糾謬宜得  
端士迺允僉言恭惟某官雅量澄波高標峙岳淵源奧  
學黜惠子之五車博極洽聞陋張侯之三箇言語妙乎  
天下名聲重於朝廷雍容西禁之嚴參總東朝之務太  
宗之用李勣雖暫屈於階資劉憲之事明皇欲留意於  
經籍載稽盛德宜掩前聞某遠託餘光夙叨末契覩絲  
綸之誕布徒傾賀廈之誠瞻屏著以非遙莫遂趨風之

便其如抃躍難既敷宣

賀虞純臣戶部侍郎啓

伏審經賦中臺納書藏室宸廷日侍增從橐之光華海  
宇風傳聳儒林之觀聽恭惟某官受材膚敏造道淵源  
如延年之安和備詳於諸事若子政之洽汰博綜於羣  
書外徧總於使權中再直於憲府名聲籍甚功效卓然  
自擢貳於王城亟超登於卿寺逮茲異數盡出深衷節  
制度以阜民財暫煩於心計攜文華以緯國典更賴於

筆精佇膺及席之求遂正秉均之拜某登門最早處世  
多奇雖感慨激昂思稱眷存之意而棲遲困抑莫陪英  
俊之游側聞出綺之恩猶動彈冠之喜鳳皇翔于千仞  
方為瑞於明時鷁鶴巢于一枝願永依于巨庇

賀光祿卿啓

伏審肅承中詔寵陟正卿睿眷方隆姑詳試於衆事貴  
名增重實大慰於羣情恭惟某官雅性內融清猷濟發  
議論忠直有愛民憂國之風道術通明有博古練今之

學居皆可紀去必見思昨進總於漕臺旋入毗於京邑  
坐襄密勿之治載觀盤錯之能逮茲三遷曾不累月蓋  
功多賞厚宜蒙優渥之恩而官顯職閒佇膺侍從之選  
引領以冀斯言不諛

賀曾叔夏除秘書少監啓

伏審顯承制檢榮貳書林在於見聞孰不欣快惟國家  
廣右文之化眷圖籍盛中禁之儲凡居三館之流必極  
一時之選矧典領於庶事將模楷於羣英非博物洽聞

學總萬方之畧而成德懿行身兼數器之長曷穆師言  
用當帝眷某官造顏閔之極窮游夏之淵源謝琨風華  
宜居第一壽王智略可謂無雙蚤自著於明時遂擢登  
於要路詞人墨客爭諷新章東觀南臺共傳妙譽逮出  
將於使指旋入贊於國師摛筆見重於青宮剖竹屢移  
於皂蓋方倚濟民之術俄興將母之恩直館燕居雖鬱  
搢紳之望親庭色養幾忘軒冕之榮果膺側席之求亟  
奉賜環之寵太宗下德音之詔蓋賴振於高風九齡草

渤海之書豈特稱於雅度竚聞異渥超賓近班某頃託  
幃幪嘗叨盼睐望風引領徒勤燕賀之情承顏接詞莫  
預鳬趨之列永言悃愞難既敷宣

賀祝幾叟除軍器監啓

伏審顯膺中詔擢據要津恭惟慶愜竊以其官厚德鎮  
浮高標映世兼求賜之達藝竊游夏之淵源發藻儒林  
含香華省登車攬轡瞻益博之威稜輓栗飛芻陋弘羊  
之心計較然課最簡在宸衷逮茲縣檢之須果奉蒲輪

之召眷推五監實次六卿方朝廷尊榮人咸知於重內  
矧國家閒暇政尤急於除戎行聞畫接之餘遂席從班  
之列某誤叨眷獎久竊庇庥承顏接辭莫遂延賓之列  
望風引領敢忘執御之儀

賀王元將左司啓

伏審顯被詔除榮聯宰屬傳聞四遠欣愜一詞惟神考  
之大猷參前王之成憲方熙寧厲精於政本肇新檢正  
之員逮元豐董正於治官始建都司之日上承二轄下

總六曹任遇益隆每補侍臣之缺諮詢所賴常參丞相  
之謨自非名流曷諧僉論某官清標濟發雅性內融學  
博綜於羣言文咸工於衆作居官可紀藹然良吏之風  
見義必為展矣仁人之勇果動中朝之譽寢階上宰之  
知紬繹圖書校讐秘典繼奉薦延之寵密承親燕之間寤  
意一言已布褒賢之旨隨機獨誦尤高達禮之聲載簡  
淵衷用須渥澤如元衡之詳整詎止於三遷若方進之  
通明寧淹於旬歲佇聞善績超賓從班某蚤接高標謬

蒙深眷抗塵走俗誰憐范叔之寒引領望風竊效貢公  
之喜永言悃愞難既敷宣

賀虞純臣監察御史啟

伏審顯奉明綸入參憲府士夫交慶遠邇同詞惟上聖  
之保邦掩前王而圖治練羣臣而核名實既大正於官  
邪揚鴻烈而章緝熙將坐清於政本眷茲風憲之地實  
為耳目之司贊論議於臺中必得通達之士振紀綱於  
轂下尤先亮直之才恭惟某官氣鍾河嶽之靈性挺圭

璋之美柔不如而剛不吐事可法而容可觀溢於文辭  
蔚若嚴徐之辨藝於政事綽然求賜之賢傳王謝之風  
流被洪寬之緣飾進由德選結自主知攬轡觀風豈特  
詳求於吏治察帷問俗固嘗博究於民情夙推刺舉之  
明藹擅平反之譽然蕭傅之意雅在本朝而谷永之心  
嘗存省闔果膺睿渥擢據要津名聲重於一時風采聞  
於四海涉赤墀而登文石方密奉於清光歷金門而上  
玉堂佇超躋於法從其屬拘官次莫造賓閣傾頌實深

敷陳罔既

賀虞純臣復監察御史啓

伏審王廷錫命方假虎符帝宸記功復還烏府幾叨眷  
獎舉集欣愉恭惟某官道術通明議論深博被服周孔  
之訓淵源游夏之文以仁義而事君蓋無施而不可用  
儒雅而飾吏故所臨而有聲頃自南臺出居直館既屢  
更於歲律實大鬱於輿情果奉明綸言歸舊貫盡出聖  
神之獨斷曾微左右之先容矧知六察之聯分斜百司

之謬明目張胆將振舉於朝綱褒德錄賢竚超登於法  
從其辱知有舊稱慶無從瞻紫詔之優隆徒勤頌詠顧  
青衫之牢落永識依歸

賀陳國英頤事啓

伏審疏恩中禁領職合官凡在觀瞻孰不欣快惟聖有  
作與天為徒參稽三代之文祖述九庭之制臨朝聽朔  
獨觀乎萬化之原攷古建官分命以四時之事宜特謹  
陰陽之端而明庶政固將協終始之序而熙百工非時

之冕不預茲選恭惟某官躬稟淳明之質體兼通敏之  
才學必造於淵源行不踰於閭域蚤膺薦拔丕著猷為  
蘭省陞華蔚然高績琳宮就佚籍甚休聲密承堯舜之  
知擢貳羲和之政上泰階之政方賴於明謨登赤墀之  
除躋躋於法從某夙叨盼昧阻奉光儀側聆綸綺之頌  
但切門闈之慶

賀周文翰除待制提舉醴泉觀啓

伏審簪筆持橐榮躋侍從之聯就日望雲密奉清閒之

燕遂留直館以便告猷綸綺既行搢紳胥慶恭惟某官  
繼韋平之經術傳王謝之風流孔鯉過庭嘗聞學禮孤  
毛能仕蓋本教忠方賈誼之少年若馬周之素宦藉甚  
漢庭之譽煜然蕭葉之光未膺傅野之營求久歎周南  
之留滯明珠無顏掩萬仞以騰輝勁竹有根貫四時而  
挺節坐更二紀歷事累朝郤穀之敦說詩書嘗先於  
謀帥黃霸之奉宣詔令尤長於治民逮茲千載之逢適  
契一言之寤緬懷先正夾輔前人是為社稷之臣豈持

棟梁之用啓金縢之策既彰姬旦之勲列麟閣之圖復  
冠霍光之右特書典冊永勸臣工始知天網之無私終  
見相門之有子載頌新渥式寵世臣峻內閣之清班總  
列仙之秘宇楓宸備問已符丹辰之恩賢梅鼎調元佇  
席青氊之圖舊某夙叨末契嘗辱殊私瞻紫詔之優隆  
徒勤頌詠顧青衫之牢落竊有依歸

賀陳國珍集英修撰啓

伏審疏恩中禁就佚真祠冠書殿之隆名參曲臺之鉅

典綸言既布輿誦交歡矧叨河潤之恩尤切夏成之慶  
惟國家享巍巍之治海宇盛郁郁之風謂建功之路益  
多而盡職之稱尚寡嚴褒序之法既增設於九尊資論  
譏之官復肇新於三等自匪傑出之士孰膺超授之榮  
某官雅性內融清標濟發柔不茹而剛不吐事可法而  
容可觀博通前古之宜練達當今之務出逢熙載寘擢  
要津精敏之才譽高華省淵源之學望重合宮載簡清  
衷果須異數方將休息乎篇籍之圃翱翔乎禮樂之場

遂登禁近之聯用席公台之路顧如弱植早接高標引  
領望風深結搖搖之志裁緘寫抱徒殫軋軋之辭願以  
微軀永依巨庇

賀留守大資再任大名啓

伏審光膺寵渥顯錫命書陞秘殿之崇資壯留都之重  
寄伏惟慶慰恭以某官智周物表學優域中博通前古  
之宜練達當今之務世載令德獨映明時自結清衷荐  
更劇任進擢地官之長攝兼天府之繁總綱紀於中臺

號魏杜戴劉之稱職贊機衡於西省有舉夔稷契之嘉  
謀逮奏績於中山益流聲於外閭迺勝北門之巨屏實  
惟全魏之要津控強敵之咽喉繚洪河之襟帶疇咨元  
帥允藉壯猷布惠頒條善政亟成於五月折衝制勝威  
稜遠被於殊方確乎柱石之姿隱若金湯之固漫更歲  
律大鬱師言蓋對揚王休雖久佞性諧之益而徒得君  
重故尚勤綏御之方用峻隆名肆頒異數載懋優賢之  
禮式昭體國之忠民吏均歡不改旌旗之舊士夫竊頌

行同袞鵠之歸惟是孤蹤久陶大冶覩絲綸之誕布徒勤燕賀之誠瞻屏著以非遙莫遂鳬趨之願其如欣抃實倍等倫

賀留守太尉啓

伏審授鍼齋壇誕布絲綸之寵分符留鑰出當屏翰之雄凡預眷存舉深欣快恭惟某官受天地之氣稟河嶽之靈窮六藝之遺文臻乎道奧漱百家之芳潤驅於筆端蚤逢特達之知亟踐高華之選挺然勁節竦聞異域

之中藉甚英聲實出本朝之右粵自北樞之宥密遂參  
西省之幾微禦侮折衝威制百蠻之命贊元經遠規恢  
萬世之功去國十年秉心一節顧艱難之備歷曾肯綮之  
未忘果膺黼辰之恩亟被鋒車之召賜便殿之對密承  
三接之恩新秘殿之名欽奉十行之詔永懷舊績載舉  
徽章式嚴上將之儀增重北門之寄宸心允屬海宇具  
瞻大纛高牙暫煩於卧護玄裳赤舄共佇於遄歸益隆  
千載之期永輔三皇之治某夙叨盼昧嘗辱品題徒勤

賀廈之誠阻預曳裾之列其如欣抒實倍等倫

賀梁才甫建節再任大名啓

伏審誕敷制命寵建節旄嚴上將之威儀仍陪都之管  
籥凡叨顧遇舉集欣愉竊以漢命師徒實重將軍之寄  
唐分方鎮始知節度之名粵我治朝參稽往制非耆德  
宿望均體股肱則元功盛勲任國柱石方奉揚庭之號  
用膺錫錢之榮恭惟某官外博而內融誠周而道遠身  
履衆善兼孔門之四科世載令名繼虞庭之八凱蚤值

千齡之會每彈一節之誠用無施而不宜事雖艱而必濟入參大政罄蕭曹丙魏之謀謨出殿近邦著邵杜龔黃之善最進退有度夷險莫渝自再佩於麟符既屢頒於鳳詔裴度未老久臥鎮於北門申伯于蕃宜圖居於南國亟奉齋壇之拜益隆岩石之瞻大纛高牙方折衝於鎮俎玄袞赤舄佇遄歸於廟堂某久辱眷憐屬茲拘窘未遂掃門之願徒勤賀廈之誠

賀徐帥以宮使召啓

伏審顯膺帝綺入觀王庭賢人在朝自厭無形之難聖  
王求舊方圖不世之功成命一行歡言四布恭惟某官  
德推國器學擅儒宗以經綸兼善之才自結當寧而承  
平極治之世荐據要津論不詭於聖人議有益於天下  
內參丞轄建教化而圖安危外總帥垣敷詩書而說禮  
樂雖艱難之備歷曾肯綮之未嘗志在憂民故居皆可  
紀忠惟憂國故知無不為英俊所以慕義而心降姦宄  
為之聞風而胆落確爾柱石之固凜乎霜雪之嚴暫從

琳館之優亟奉鋒車之召造明朝而承聖問密賜清宴  
之間好忠諫而悅至言極陳治安之策然後茂敷於寵  
典遂將永冠於元鈞某蚤被眷知屬拘官次情同巢燕  
方希大廈之成困若鮒魚行冀西江之決其如瞻頌難  
罄敷宣

賀張師子除運副啓

伏審顯膺宸眷出總漕權恭惟慶慰竊以列土分城朔  
部實本根之地乘軺建節外臺為耳目之司矧當富庶

之期尤重轉輸之寄將以佐大農之調度必能通萬貨  
之盈虛苟非其人不預茲選伏惟某官高風邁往厚德  
鎮浮知無不為既荐更於劇任忠而能力蓋自結於淵  
衷藹然譽望之隆卓爾功庸之茂眷茲北道昔仰使華  
劉晏之才恥粒食之不運棄羊之智獨心計之無垠固  
嘗博採於民風豈特周知於吏治逮再頒於明命益下  
聳於歌謡朱博駐車衆共驚於決遣范滂攬轡志雅在  
於澄清停聞奏課之優遂陟從班之峻某區區晚進碌

碌諸生閭里相逢蚤有登門之舊幘幪所逮敢伸賀廈  
之誠

賀沈和仲除秘閣脩撰陞運使啓

伏審就遷使指加寵書林綸綺始須搢紳胥慶竊以內  
閣論撰之職密亞從班外臺轉輸之權最稱劇任必才  
德之俱備與資望之素隆乃奉明揚併膺異數恭惟某  
官嘉猷經遠敏識造微博通前古之宜練達當今之務  
會逢千載自結九重含香握蘭譽高郎省蜚芻輓粟坐

給邊屯固已致萬箱之盈豈特有三年之委造明朝而  
承聖問深契於淵衷褒有德而報厥功荐推於茂典眷  
惟朔部久仰威稜竚聞盤錯之虛載奏澄清之化遂躋  
宥密以席公台某項伏下僚嘗叨外舉望風引領但勤  
賀廈之誠承顏接詞方阻登門之願其如歡抃難罄敷  
宣

賀沈和仲運使陞右文啓

伏審密承賡渥光奉寵章就陞書殿之華增重計臺之

寄凡叨盼昧咸集歡愉眷上聖之端臨方羣才之並進  
厲世磨鈍肇新優異之名褒賢顯功馴致侍從之列恩  
榮昭異序進惟艱恭惟某官河獄炳靈圭璋特秀淵源  
之學映照儒林卓犖之才羽儀仕路入踐郎曹之要出  
分使節之光嘉績藹然休聲藉甚遂躋冊府移總漕權  
中宸寶秘之儲內閣論撰之職繼膺妙選益簡清衷屬  
貢教之聿興革夷風之方煽明詔屢下嘗恐斯人之未  
孚碩畫既陳坐致列城之丕變果動冕旒之聽亟聞綸

綺之領歷金門而上玉堂佇還登於近密攀臺階而窺  
紫闈遂進輔於休明某頃伏下僚謬蒙深眷因同斥鷁  
但騰躍於藩籬樓共鶴鴟願翹翔於梁棟

賀李敦仁除直秘閣陞運副啓

伏審黼宸酬勲絲綸錫寵就躋榮於秘職仍增峻於使  
權凡叨河潤之恩咸集夏成之慶惟國家推右文之化  
眷圖籍盛中禁之儲倬彼東壁之驪煥乎羣玉之府既  
得殫見洽聞之士紬繹其間又俾抱功修職之人光華

於外自非遴選曷副僉俞恭惟某官酌道德之淵源漸  
禮樂之腴潤學優而仕行孚而名自著明時荐更劇任  
登車攬轡瞻五博之威稜輓粟飛芻陋洪羊之心計將  
使有餘財而頌作豈特不加賦而用饒逮茲歲月之淹  
益簡聖神之眷肆頌異數允答殊功民吏均歡適契借  
留之願士夫竊頌行聞趣召之恩某嘗辱品題屬居官  
次莫遂門闈之慶敢忘尺牘之修

賀沈耀使除直秘閣賜金紫啓

伏審入簡宸衷出膺綸告書林寓職載昭稽古之功命  
服表容益懋崇賢之典傳聞四遠欣愜一詞眷睿聖之  
敷文操爵賞以厲世由內及外咸歡於工師惟器與名  
每難於授受况麟閣極一時之選而金章著三品之儀  
偉寵數之兼隆實士夫之榮遇恭惟某官崧高毓粹昂  
宿騰輝酌道德之淵源卓爾儒者之效漸禮樂之腴潤  
充然君子之容蚤結綬於學宮荐含香於計省登車問  
俗既領政於六條廣稟備邊遂舒憂於九歲方馳誠於

魏闕俄奉最於甘泉三接對揚望清光於咫尺十行誕  
布領異數之便蕃內聯英俊之蹠外煥皇華之節賜郭  
賀之黼黻秩物斯隆塞賈琮之帷裳澄清允洽風采聳  
聞於天下名聲益重於朝廷席是休恩竚聞趣召石室  
金匱紬書還籲於芸臺金馬玉堂簪筆亟持於荷橐顧如  
愚朽竊仰庇庥承顏接詞莫趨賓廡望風引領徒激歡  
悰

賀提刑啟

伏審錫寵中宸宣威甸服綸言誕布輿論文欣眷大明  
之保邦歌皇華而遣使化自近始先畿內以觀風澤欲  
旁流俾方垂之作則其底措刑之盛尤高執憲之權議  
獄釋冤賴平反於次骨督姦懲惡資決遣以如神苟非  
傑異之才曷副詳求之意恭維某官高標峙玉雅量澄  
波家傳王謝之風流學富韋平之經術蚤陪熙運亟據  
要津出分朔部之憂增重外臺之寄眠歲時而飲散民  
忘艱食之虞闢耳目以澄清吏盡竭情之報風采聳於

天下名聲重於朝廷卓然課竄之休允矣淵衷之眷謂  
緣人情而制法固非俗吏之爲若傳古意以決疑必有  
儒者之效故茲褒擢式協都俞瞻華闈之峩峩方趣裝  
而首道望清光之咫尺佇前席以疏恩獨憐策蹇之愚  
幸遇登龍之末敢同燕雀聊申賀廈之誠願與兒童共  
效攀轅之戀其如欣抃實倍等倫

賀林德祖提學啓

伏審光奉宸恩寵將使指綸言誕布輿誦均歡恭維某

官松柏挺資圭璋成器無雙流譽獨高荀爽之八龍累  
百論長蚤擅櫛衡之一鶴休息乎篇籍之圃翹翔乎禮  
樂之場窮言偃之淵源陋賈山之涉獵賢關擢秀朝路  
陞華絳帳崇儒暫淹鱸席青氳圖舊宜集鳳池果被薦  
延亟領渥澤入對清閒之燕出分刺舉之權效孟博之  
澄清此其時矣瞻李膺之模楷竊有媿焉某承學謾聞  
抗塵冗吏屢成燕賀已紓巢幕之憂林茂鳥歸終冀栖  
枝之樂永言欣躍實倍等夷

賀提學察院啓

伏審宸衷錫寵誕膺褒詔之榮吳會觀風復被皇華之選傳聞四遠欣懼一詞恭維某官杞梓呈才圭璋在篋蚤繇射策擢秀賢關自致明時陞華要路紬書東觀咸推良史之才執憲南臺雅擅直臣之譽建出分於使指方遠布於教條攬轡澄清已肅范滂之志下帷講誦猶傳董相之經眷茲綸綺之班益聳搢紳之望雖地分二浙資領袖於百城而塗徑上都佇對揚於中禁遂躋從橐

永輔昌圖某晚學微生備員下邑披雲有幸嘗叨游霧  
之恩窺豹何知徒切攀轅之志欣依無極敷述奚殫

賀提學博士啓

伏審光奉宸恩寵將使指除音始布已傾多士之心德  
望所臨實聳列城之聽恭維某官圭璋挺質杞梓呈材  
下筆屬文仲舒本淵源之學潛神默記孟堅推通敏之  
才夙高絳帳之名薦中青錢之選浸承睿渥進秩賢關  
妙攬六藝之文夐出諸儒之右眷齊魯之奧境有孔孟

之遺風方國家明道德之源而郡縣謹庠序之教哉冠  
博帶競集於儒林揭節乘輶宜資於德器果被光華之  
選出分刺舉之權拂霧披雲孰不快於先覩寰裳負弩  
方韋廁於前驅瞻愫之勤顛沛於是

賀梁方甫知青州啓

伏審簡宸眷之優隆奉聖書之溫厚起從散地還畀名  
藩遐邇傳聞士夫鼓舞恭惟某官人倫準的帝室棟樑  
出入周衛之中從容廟堂之上鳳池經體藹然丙魏之

聲麟鑰承流卓爾龔黃之政頃坐單辭之誤荐貽左授  
之辜仲華當榮悴之交子文無喜愠之色撓之不濁仰  
之彌高果軫睿慈亟頒渥澤慰藉甚厚毗倚增隆眷茲  
海岱之區尤先獄市之寄俗閭達而多智吏舒緩而養  
名太公始封務行平易之化曹參為相亦隆清淨之風  
欲詔令之究宣俾羣黎之悅服則其謀帥實重得賢吉  
甫文武之才萬邦為憲申伯柔惠之德四國于蕃暫偃  
息於鈴齋佇還登於鼎鉉某夙叨末契嘗辱薦書贍綸

命之既領喜深鳬藻仰台蹕之方渙終托陶鈞引跋門  
牆神魂飛越

賀徐澤之換延康知汝州啓

伏審宸衷眷舊綸告敷榮新秘殿之隆名鎮臨汝之奧  
境傳聞四遠欣愜一詞恭惟某官勁竹有筠明珠無穎  
希求賜之政事師游夏之淵源持轄疑丞擅戴劉之美  
譽承流屏翰追邵杜之遺風道易地以皆然才何施而  
不可仕無喜而已無愠忠貫子文撓不濁而澄不清量

包叔度心常存於省闈意雅在於本朝退處真祠出麾  
便郡徒得君重簡在帝心薄淮陽之行寧久煩於卧治  
肖傅巖之夢固匪待於旁求佇看賜環即參調鼎某昔  
叨掾屬嘗辱褒嘉瞻鳳檢之優崇徒勤燕賀想龍門之  
容接莫預鳬趨

賀鮑守啓

伏審中禁疏恩左符出守方趣裝而首道已懽誦之載  
塗恭維某官雅量澄波高標峙玉傲墳典之場圃游道

德之平林奧學醇師窮淵源於游夏懿文華國粲麗藻  
於班揚自著明時擢登要路飛芻輓粟外搃使華含香  
握蘭入參省闈休聲籍甚明效卓然暫均逸於琳宮俄  
思賢於黼扆弱翁方且大用治行蓋已深知長倩雅在  
本朝政事欲其詳試乃眷廣平之望郡實惟河朔之與  
區俗雜燕趙之風分當昂舉之野徒得君重聊資游刃  
之才對揚王休行被賜環之寵某夙叨末契嘗仰餘光  
林茂鳥歸幸將依於巨庇廈成燕賀喜實倍於衆人

賀通判朝奉啓

伏審顯奉帝恩同宣王化方趣裝而首道已騰誦之載  
塗恭維某官仁本天資忠繇世躋身端行治蚤推南國  
之英功著職修久動中朝之譽果被出綸之命來分半  
刺之權題仲舉之輿旣膚妙簡展士元之驥宜有宏規  
固將大慰於羣情然後亟躋於要路顧惟弱植竊伏下  
僚披雲霧而覩青天佇高標之是仰侍門庭而操綏簪  
想至德之可師欣頌交深敷陳因旣

賀林德祖除府司錄啓

伏審顯奉制恩榮參天府傳聞所暨欣愜攸同眷上聖之保邦繼先猷而創制謂神州環拱巍巍萬乘之居而睿澤旁流翼翼四方之極並建掾曹之任總攝紀綱之司奉令須條密贊百司之化繩違糾滯中分一府之權蓋其官顯而職閒故必才高而望重副茲遴選允屬名儒伏惟某官與學醇師清忠奕世深明經旨久下仲舒之帷默纂聖謨嘗給相如之札頃繇泮水擢領外臺攬

轡宣威旣周知於吏治攝齊問道方大振於儒宗卓然  
治行之優籍甚士夫之譽逮還朝著式簡淵乘果聞綸  
綺之頌深慰輦轂之望涉赤墀而登文石佇入對於清  
光闢紫闈而攀台堦將盡攄夫素蘊某辱知有舊稱賀  
無從延跂門闈徒勤方寸

賀徐帥啓

伏審光膺宸眷寵錫命書名蕪秘殿之隆地列東籜之  
重側聞字號實允僉言恭惟某官道術通明行能高妙

伏頹閔之軌躅窮游夏之淵源簡在清衷進躋顯仕謀  
王體而斷國論經先聖之大猷擴帝紘而恢皇綱致至  
治之成法休聲籍甚明效卓然眷茲海岱之區實為獄  
市之寄俗闊遠而多知吏舒緩以養名太公始封務行  
平易之化曹參為相亦隆清淨之風欲詔令之究宣使  
羣黎之悅服則其謀帥尤在得人望之聊試於臨民張  
敞素長於治劇激貪厲俗高風已震於百城布德施仁  
善政竚成於五月復被絲綸之寵亟居鼎軸之崇霑澤

生民懋昭賢業某晚生盛世夙仰鴻名大袖褒衣獲預  
椽曹之列輕裘緩帶將瞻君子之威歡抃之誠敷陳曷  
既

代賀鄭太宰啓

伏審誕膺顯冊還冠上台固執禮經屢上終喪之請難  
回睿斷嗣聞明詔之頒凡在陶鎔率同鼓舞竊以人子  
之達孝在於揚名而顯親大臣之致身固將忘身而憂  
國裔孫為貞觀之良弼嘗賜策而起官曲江當開元之

盛時亦奪哀而命相眷惟上聖方闡大猷念守文之難必資同德顧注意之重獨冠羣賢蓋天下不可一日去公則君子寧俟三年之制恭惟某官學舉六藝才兼四科確乎柱石之資卓爾棟樑之任蚤出逢於熙運俄徧歷於要津職典樞機載陪國論坐運籌策遠暢皇威遂符夢卜之求即正鈞衡之拜有非常之士能立非常之功建無窮之基亦有無窮之聞方倚濟川之助遞罹陟岵之悲罔極之報雖深仰成之眷彌切趣襄窀穸之事

繼頒賜賄之恩參考前規端歸舊貫制恩以義非有衣  
錦之嫌移孝為忠久副虛席之待方將詢封禪之事而  
廣符瑞之錄豈特垂仁義之統而創道德之塗伊尹之  
享天心咸被堯舜之澤周公之相王室誕保文武之功  
益膺黃髮之祥永作蒼生之福某斗筲小器樸樞散材  
披雲霧而覩青天曩嘗聞於聲教侍門庭而操紱奪久  
絕望於音塵阻陪班謁之儀竊動彙征之喜

代賀太宰遷少師啓

伏審策勲石室進秩槐庭弼予一人增峻代天之任通  
於四海具瞻相國之尊恭惟某官識造幾微學窮繫表  
獨執魁柄運量羣生默化陶鈞協和衆志休息詩書之  
府翹翔道德之林彌綸列聖之猷裒舉舊章之懿謂稽  
方策之布惟文武之同揆然辨典謨之篇蓋堯舜之繼  
踵允資鴻筆克正宏綱肆申秩之載新曾歲時之未久  
文真事核豈惟配太史之書體大思精固已陋蔚宗之  
作歡連九廟慶浹萬邦果奉殊恩亟頒明命密拱重熙

之運永昭垂範之光某夙荷眷存方深庇賴仰棟隆之  
吉知注意於賢賢陪鵠輔之良敢竭心於贊贊其如抃  
躍曷旣敷陳

代都仲憲賀少宰啓

伏審誕布策書延登揆路士夫交慶遠邇一詞眷上聖  
之保邦稽前王之圖治用賢人而行善政將坐致於殊  
休褒有德而賞元功以寵昭於異數自非學窮闇奧識  
造幾微通於時用之宜明於王事之體下可以厲羣臣

而厚風俗上可以順四時而理陰陽則何以協贊天工  
緝熙帝載揔百官之職遂萬物之宜果得真儒來膺茂  
典恭惟某官深誠許國直道事君出入累朝周旋衆務  
休聲茂實夙推公輔之才遠畧壯猷久蘊經綸之志險  
夷自信終始不渝肆召節之初傳實儒林之溪望造明  
朝而承聖問默契淵衷好忠諫而悅至言載登舊德粵  
繇真館擢貳西臺嘉績藹聞貴名增重荐頌帝制進秉  
國鈞方將謀謨帷幄之中端委廟堂之上明好惡而定

去就務教化而省禁防誦詩書之言施于有政興周召  
之業傳之無窮某早辱知憐獲依庇賴奉法承令方逃  
失職之誅引領望風莫遂造門之請其於欣誦曷既敷  
宣

代都仲憲賀何相啓

伏審錫命王庭躋榮宰席貢賢登用均萬類以蒙休明  
詔初傳浹輿情而共慶惟昔用人之謹莫如論相之難  
非惟寵冠於當時以昭異數必使道侔於前哲乃允具

瞻恭惟某官識造幾微學窮閭奧寬大好禮久推公輔  
之才沈厚有謀夙蘊經綸之志屬聖人嗣承於帝統眷  
名儒早侍於經帷亟被選掄徧躋華近至言讜論孰逾  
舊學之賢茂實休聲迥出羣臣之上遂由選部入贊樞  
機方注意於勲庸果繼膺於典冊方將緝熙帝載弼亮  
皇猷端委廟堂雅望儀型於百辟謀謨帷幄威名振耀  
於殊鄰光輔聖時茂昭賢業某遠將使指阻造釣閑側  
聞綸綺之頌益賴帡幪之賜傾依之素敷述奚殫

代都仲憲賀侯樞密啟

伏審顯奉殊恩入參密命側聞孚號實允食言惟睿智之有臨選英豪而並建明安危於廟堂之下獨親萬化之原運籌策於帷幄之中決勝千里之外宣昭政事輝耀威靈宜得真賢茂膺寵典恭惟某官篤厚有智廉潔無私學窮游夏之淵源德伏顏閔之軌躅嘉言讜論早承當寧之知茂實休聲迥出羣臣之右果擢參於兵政以進秉於事樞方將說禮樂而敦詩書坐制四夷之命

重國家而尊社稷遠司三代之風永保榮名益據素蘊  
某屬將使指阻造鈞闕承顏接辭仰恃眷憐之舊望風  
引領徒深頌詠之歌

代都仲憲賀余門下啓

伏審光奉殊恩誕敷明命輶紫庭之樞近居黃扉之清  
華惟睿聖之有臨掩皇王而圖治旁求俊彥並建豪英  
揚洪烈而章緝熙以輔成於先志練羣臣而數名實將  
協贊於天工謹選股肱之良增重機衡之寄恭惟某官

行能高妙道術通明論不詭於聖人議有益於天下卓爾公忠之操凜然勁直之風出入周衛之中徧躋華貫從容廟堂之上久著嘉猷逮茲溫詔之頒進貳東臺之政上心允屬物望攸歸擴帝紘而恢皇綱參冢宰之重職謀王體而斷國論侔先聖之大猷澤被生民名垂後世某遠將使指阻造釣闕任職居官方托庇庥之末奉法承令庶幾罪戾之逃願與生民永瞻至化

代余帥賀吳門下啓

伏審顯膺睿眷誕布除書輶從真館之優入贊東臺之重士夫交慶遠邇同詞恭惟某官識造機微學通倫類  
蚤遇休明之運荐登樞近之聰遠略壯猷卓爾經綸之志碩德重望隱然公輔之才出入備更功效益著肆領  
異數允答殊勲顧慙哀朽之資謬竊藩宣之寄大鈞挾  
北方咸遂於羣生廈屋帡幪願永依於巨庇

代都仲憲賀中書侍郎啓

伏審光奉綸言入參機務真賢用而天下治將均四海

之休有德進而朝廷尊實為多士之慶恭惟某官辯智  
閑達仁愛溫良高風無愧於古人雅望久隆於當世北  
門待詔陋嚴徐賈馬之文左轄持綱擅魏杜戴劉之美  
繼宣勞於外屏復就逸於真祠直道以行嘉猷屢告果  
膺睿眷亟降恩書登處俊於朝蓋資遠識任元超以政  
豈藉多方將弼亮天工緝熙帝載建萬世之長策為  
一代之宗臣某夙荷眷私屬將使指庇身無地知廈屋  
之帡幪運物無私播大鈞之坱圠其於欣頌曷既敷宣

代賀右丞啓

伏審欽承詔綺擢貳政機大夏方成朝廷增重洪鈞所  
播海宇蒙休竊以黃帝宏天道以明民風后協吹塵之  
契高宗師古訓以建事傳說膺肖象之求益君臣之遇  
合至難然天人之變通無間惟精神之運默得於萬物  
之先故政化之隆終成於千齡之會亶復昭於盛事宜  
間出於異人恭惟某官學窮六藝而發為典麗之文才  
備衆長而養以恢闊之德夙簡宸衷之眷潛符帝賚之

祥茂實英聲雍容徧躋於華貫忠言勁節慷慨思濟於  
蒼生時咸溪於經綸士久瞻於領袖果茲超拜益侈異  
恩方將超唐虞之純風弼迺后於翼憲興周召之遺業  
揚茂化於醇釀然後進登上宰之榮永作太平之輔斯  
言有證輿誦所同某仰荷眷憐俯深慶賴屬沉薄領遠  
分刺史之符願採民謡繼上賢臣之頌

代賀開府相公啓

伏審睿眷酬勲誕揚漁號隆名錫寵增煥具瞻凡叨坱

北之恩咸集帡幪之慶竊以將相之器兼乃中外之權  
極文武之選於一時等威儀之多於三事苟非社稷之  
衛孰為邦家之光恭惟某官冠冕儒林棟樑帝室學造  
六經之奧行包九德之純出入三朝陳萬世之長策雍  
容三府凜一代之宗臣授節齋壇領祠真館折衝枕席  
之上運籌帷幄之中禁幄橫經上論堯舜之道家庭聯  
萼遠符周召之風肆推不世之才益懋無窮之業袞衣  
赤舄參華鼎足之司豹尾神旗增壯轅門之勢見聞所

暨朝野同詞某晚學無聞效官有守閑公孫之間雖莫  
預於曳裾登元禮之門願早諧於望履輒通尺牘仰布  
寸誠瞻抃交欣敷陳罔既

代賀太尉啓

伏審高秩厚禮誕昭懋賞之規盛德謙隆荐布陳情之  
牘顧僉言之載穆宜渙號之莫面伏惟某官服勤王家  
紀功帝籍杜預智計每登將相之儔鄧禹文明深執忠  
孝之節奏七縱七擒之略揚百戰百勝之威殲厥渠魁

解犧索而夾砧斧屈此羣醜棄兵弩而持釣鉏豈惟草  
木之知名坐覺山川之改色鳩鳴鵲乳追還樂國之風  
歸舍梟巢盡蕩妖氛之俗偉茲異績夏掩前聞王曰還  
歸程伯定驛驛之衆我行永久吉甫均燕喜之思並奉  
三接之恩荐被十行之賜槐庭議叙密陪四輔之聯玉  
帳論兵益聳一軍之聽仰寵章之狎至知福祿之鼎來  
馳慶未遑移書先及倍荷眷存之厚交深愧怍之私

代石提倉賀中丞啓

伏審顯膺茂渥誕布明綸輶從華省之尊進直南臺之  
重士夫交慶遠邇同詞惟上聖之保邦掩前王而圖治  
用賢人而行善政既加惠於羣生好忠諫而悅至言將  
廣延於衆議眷茲風憲之地實為紀綱之司激濁揚清  
下察百僚之過繩愆糾謬上裨庶事之微必資直亮之  
才迺副簡求之意恭惟某官學窮道奧識造幾先出值  
明時亟登要路風采聞於天下名聲重乎朝廷崇論讜  
言善諫同乎王魏盡忠納善嘉猷合乎臯夔易地皆然

無施不可暫居武部還總中司周處直筆以震權豪薛  
宣執法以分黑白不懲自肅凜然禮義之風持平無私  
端若權衡之器懋昭賢業永保榮名某夙荷眷私屬將  
使指莫遂門闈之慶敢忘草牘之修

代賀盛運判啓

自本路常平以賑濟有方就除運判

伏審寵陟文階就陞漕計風聲所暨豈惟聳列辟之瞻  
眷遇有加蓋將為多士之勸惟常平之政令實神考之  
規模當歲豐穰必廣儲以抑兼并之室及時水旱將振

廩以濟窮乏之民能使德意之究宣允賴材猷之膚敏  
迨其成績宜有異恩恭惟某官雅性淳融清標濬發練  
達當今之務博通前古之宜蚤自結於主知荐出更於  
使事自臨東道亦既淹時屬豐沛之阻飢方聖神之軫  
慮明詔每下常恐一夫之憂碩畫既陳果為諸道之最  
載懋勲庸之典益據邦國之謀席是寵光竚登禁從顧  
如哀朽嘗奉誨言欣幸交深敷陳罔既

代賀韓漕除直秘閣啓

伏審寵膺睿渥進直書林綸命敷聞既聳列城之望使  
華增重實為多士之榮恭惟某官厚德鎮浮高風邁往  
多識前世之載博通諸家之書簡在帝衷荐更劇任飛  
芻輶粟方資轉漕之功攬轡登車已著將明之效眷此  
典籍之府允惟英俊之驅自非天下之名儒莫預朝廷  
之妙選簪筆持橐行躋法從之聯襲紫傳龜益懋前人  
之烈顧慚朽質幸假餘光馳慶未遑移書先及其如愧  
喜曷易名言

代都仲憲與新提倉啓

伏審顯奉宸恩出將使指側聞成命大慰羣情恭惟某  
官才為吏師學窮道奧身端行治蚤膺俊乂之求功著  
職修久擅循良之譽眷常平之置使實神考之大猷總  
歛散之權所以惠民而富國重刺舉之任所以佑善而  
懲奸允資成德之髦式副選賢之意况茲東道密邇上  
都攬轡觀風已肅茫茫之志駐車決事佇聞朱博之  
威顧惟哀朽之姿獲奉謹言之末其於欣幸曷既敷宣

代余帥賀濰守啓

伏審顯膺中詔出守近邦帥帥得賢士夫同慶伏惟某  
官性資純粹學問淵深蚤發策於聖時亟躋榮於要路  
卓爾公忠之器凜然勁直之風果奉宸恩俾宣王化雖  
望之之德蓋雅意於本朝如張敞之才豈久處於閭鄉  
行被荐延之寵入躋侍從之聯馳問未遑移書先及仰  
荷眷存之厚徒深感服之私

代文帥賀淄守啓

伏審光膺中詔移守近邦布政頌條方拊循於善俗望  
風引領徒渴仰於高標未遑竿牘之修遽辱緘題之貺  
伏惟某官性資愷悌材術通明經行稱於朝廷議論冠  
於宗室承流宣化式資共理之猷親仁善鄰庶假餘光  
之照惟聖神之在御思俊乂以旁求宜有褒書以孚輿  
論願言調護少副頌贍

代文帥賀郡守啓

伏審恭承帝詔出守侯藩輿論翕然休聲藉甚伏惟某

官深誠許國厚德臨民學獨造乎淵源行不踰乎閫域  
荐更事任藹著勞能果奉宸恩寵分郡守承流宣化方  
觀政績之成聲明選公佇聽褒書之下未遑馳問先辱  
移書荷眷意之甚隆激懦衷而增愧

代文帥賀盧君佐啓

伏審拜命中宸分符東土周旋閭里熙然民物之繁懷  
想風儀邈爾山川之阻豈期厚禮遂辱移書伏惟某官  
夙以才能荐更事任頃被光華之選復膺師帥之求任

職居官益懋賢人之業承流宣化佇觀循吏之風方上聖之有臨收羣豪而並用即期褒召用副輿情

改京官謝宰相啓

鈞最吏曹初無善狀掛名閨籍猥奉明恩顧惟缺然何以堪此竊以六卿之長實總三銓之流審才藝以叙官宜明賞罰以詔吏治程功積事既立限年之規舉賢援能尤嚴薦士之法是將率世而厲俗豈惟激濁而揚清矧由選甲之冗員躡寘朝行之通秩必脫穎而出者乃

拔茅以征焉蓋其責之甚詳則夫得之匪易固有耆艾  
之士連蹇而無成寧容委瑣之人循緣而妄進如某者  
長蓬萊之下乏饑石之儲疲輶奚勝樸邀莫數思竭其  
不肖之力自托於無能之辭慚師友之淵源僅成涉獵窺  
文章之林府莫望藩籬揮毫軒陛之前接武搢紳之列  
少而自喜謂青雲之可期長乃無聞顧黃卷而興歎栖  
遲五斗俯仰十年沉迷刀筆之徒勞商榷米鹽之細務  
悉匪異時之習類皆俗吏之能勉盡瘁而力行惟固守

以靜俟衆方攘袂而趨者已獨歛衽而避之每懼非才  
自貽罪戾豈期公舉謬以名聞方當綜核之期濫預甄  
陞之典楓宸旅進再瞻日月之光綸誥臚傳遽被雲天  
之澤循涯自失蹟等為榮此蓋伏遇某官端委廟堂謀  
謨惟幄務隆推於衆善固求備於一人昞昧咸加價必  
增於數倍輝光所燭氣已變於三春曾經平子之品題  
必入山公之啓事遂令駕劣亦玷龍光其敢不擇地而  
行奉職以進益勵四方之志愈殫十駕之勤雖在闡葺

之中不肯碌碌儻與陶鎔之末願竭區區

除太常博士謝太宰啓

欽奉綸恩擢參容典量才弗稱被寵增羞竊以漢設太常之員序先九列唐分博士之屬法止四人豈特贊祀事之儀將使稽右文之典諮詢所逮必淹識於舊章望實既孚或浸階於華貫矧聖神之御極方明哲之佐時朝廷尊崇人皆重內天地交泰士以彙征苟非四海之名流曷副一時之精選伏念某長蓬蓽之下乏顧石之

儲種學績文柄遲乎道藝之域潔身浴德偃息乎詩書  
之門然短綆胡可以汲深而駕足曷勝於致遠雖三餘  
之不廢曾一善之蔑聞濫追俊造之游徒勞州縣之役  
寧抗塵而走俗慙逐巧而點妍蓋有道而賤貧雖昔人  
之所恥如不義而富貴亦君子之弗為迹雖愈窮志當  
益壯奪懷中之綬初同臧氏之亡羊畀望外之官終類  
塞翁之失馬喜庇身之有託繫造物之無私此蓋某官  
端委廟堂謀謨帷幄招賢黜不肖既揚於變之風嘉善

矜不能益懋兼容之德旁採摶紳之議曲重埏埴之恩  
此日行冲得備仁傑之藥籠他時毛遂尚出趙勝之錐  
囊某敢不勉激懦衷克承嘉惠侍門庭而操綏蕡方永  
識於依歸披雲霧而覩青天願少聞於聲歎

謝承旨侍讀啓

識荊州之面已輕萬戶之封得季布之言猶重百金之  
賜矧位隆於兩禁而名動於一時擁輿望塵或逡巡而  
却走曳裾屬袂爭顛沛以乞憐儻得於眉睫之間遂

借以牙齒之論雖在前世亦所罕聞恭惟某官蚤推卓爾之才首副褒然之舉深結明主徧歷要津白日青天共仰崔羣之德太山北斗咸宗韓愈之文自趨名於北扉亟躋榮於東閣閥侈巨行不特極靡麗之辭深潤溫純蓋將追典謨之訓果奉謫仙之譽佇符夢弼之祥經體贊元入稱四輔代天理物上應三台多士傾心庶邦拭目苟非傑出之輩孰當特達之知如某者約結固亡奇樸邈不足數少承世習得免耕穫之勤生遇熙宸未

學軍旅之事區區射策碌碌效官漫逾紀以迄茲顧初心而自失詩書禮樂之際絕企前修簿書期會之間漫成俗吏幸歲時之未暮惟仁義之可師方且投身寂寞之濱安敢妄意寵榮之事徒以鄉邦接壤側聆長者之風况復兄弟同游嘗聽先生之論輒通漫刺據假溫言廁王戎之坐中既乏阮瞻之三語造叔向之堂下曾微駿蔑之一言退省懦庸分甘擯斥宜謂搢紳之見慶迺傳黼黻之誤衰惕若神驚赧然汗下此蓋伏遇某官中誠

接物內恕包荒大臣之報國以人君子之見善如己謂  
拔十得五庶間獲於異能故捨短取長務推隆於晚進  
某敢不仰承嘉惠俯激懦衷赤鯉隨波既預龍門之集  
青蠅附翼願從驥尾之遊欣抃文深敷陳罔既

進秩謝運使啓

備數掾曹每負曠疎之責量才選部宜從澄汰之科敢  
意誤恩亦叨進秩惟本朝之成憲煥古治以同風攷三  
載之績以別幽明遠稽虞氏計羣吏之治而定誅賞參

用周官必綜核之無私則進退之有叙於皇神考增飭  
舊章謂百里之民縣令實為之師帥而一州之政幕府  
能助其承宣實資保住之嚴以盡選擇之善凡在所取  
蓋拔其尤如其者性本甚愚才無近用奉過庭之訓蚤  
聞詩禮之言誦古人之書未免糟粕之累頃廩科第濫  
綴官聯計本為貧敢憚徒勞之役職當讞獄惟持近厚  
之心然而知不足以決疑學不足以明古抗塵容而走  
俗狀雖每愧於初心追時好而取世資詎肯渝於素

守區區自信碌碌亡奇曾無根柢之容坐竊巵石之祿  
迹其遲鈍莫效微勞仰借吹噓遂獲寸進此蓋伏遇某  
官至誠與下雅量鎮浮本公孫之知人故能舉善同當  
時之推士用以成名曲垂汲引之仁靡擇行能之備致  
茲蒙陋亦玷寵榮某敢不思其未能勉其未逮潔已以  
進期異日之有成直道而行庶終身之寡過上酬恩造  
次答已知

謝蘇憲舉陞陟啓

驚力奚堪方竊卿雲之庇鴻私所逮遽叨華袞之榮揣  
薄分以非宜誦溫言而增愧惟邦家之致治莫大於薦  
延眷士夫之求伸必資乎汲引管仲得志實由鮑叔之  
知龔勝顯名終藉何侯之力拔茅連茹者多矣彈冠結  
綬者有焉然人實難知紛賢愚之並進况士既自售久  
廉恥之莫興倘默然在稠衆之中而介如乏拔躰之勢  
執手以上遠冀前哲之風傾蓋而交無復下僚之歎靜  
言斯道每謂難能敢自意於妄庸迺辱知於特達伏念

某駕駘下質樗櫟庸材猥倖進乎官聯敢營情于右秩  
豈期清舉謬以名聞此蓋伏遇某官雅望鎮浮深誠與  
下明如冰鑑自莫遁於妍媸平若權衡本無私於輕重  
致此吹噓之賜生於顧盼之間某敢不恪守官箴持循  
士檢雕朽磨鈍期益屬於初心錯節盤根庶終收於來  
效

謝提刑薦舉啓

補吏掾曹方虞擯斥挂名奏牘忽預薦論顧謗薄之無

堪辱褒揚之甚厚惟本朝之垂憲俾諸道以選能謹劄  
時英出將使指寰惟問俗豈惟博究於民情攬轡觀風  
固欲熟知於吏治予以揚清而激濁庶幾怙善以懲奸  
倘非適用之才曷副推賢之意如某者受資凡陋涉道  
淺踈蚤承訓於義方粗服勤於世習區區射策初無一  
日之長碌碌效官甘處衆人之後踵常塗而自愧敦夙  
好以未能但期罪罟之逃敢冀薦書之上此蓋某官高  
風邁往雅望鎮浮蘊厚德以并容推深誠而樂與忠能

舉善怒以及人肆加惠於微生蓋曲崇於末契登門有  
舊再叨國士之知承乏無聞首借儒林之譽某敢不俯  
勤賤役退激懦衷期益厲於初心庶不隳於素守

謝提學舉改官啓

才異正平輒叨薦鶚德優元禮濫許登龍捧檄知榮省  
躬增愧國家設銓選之法嚴保住之科雖置使以旁求  
猶限員而選擇伊欲薰蕕之異器庶幾涇渭之分流然  
人實難知雜然賢愚之並進士既自售久矣廉恥之無

聞孰興斯道之寂寥必得當世之豪傑伏念某受資至陋涉道甚疎枕經藉書徒慕古人之糟粕彈冠結綬敢希君子之經綸蚤射策於明宸僅庇身於小吏抗塵容而走俗狀每愧於初心追時好而取世資敢隳於素守居立拔聯之勢曾微左右之先豈繄攬轡之初遽辱拔茅之舉靜循最爾難稱寢然此蓋伏遇某官璞玉渾金莫名其器青天白日皆見其明廣內恕以包荒蘊深誠而與下鄭當時之推轂有味其言張安世之提衡不望

其報俾茲么麼亦沐吹嘘某敢不俯激懦衷仰承嘉惠  
鉛刀無用尚收一割之功駕馬未疲終致千里之遠

謝方提學薦攷察啓

棲遲兩郡每瞻使節之光荏苒十年再奉薦書之寵戴  
恩甚厚撫已增羞伏念某樗櫟散材斗筲小器幼承父  
兄之訓不識耕獲之勞長讀聖哲之書嘗聞俎豆之事  
雖云有志豈曰能成濫偕俊造之游徒勞州縣之役沉  
迷薄領浸忘舊學之源祇畏簡書僅免大河之域敢期

多幸荐遇深仁昨試東秦庇身屬部侍門庭而操紋筆  
披雲霧而覩青天曾微三語之賢誤辱一言之薦終叨  
寸進盡出殊私逮茲歲月之淹復預帡幪之末顧猥瑣  
齷齪無足稱焉而蠹直迂踈亦已甚矣豈冀眷存之意  
有加疇昔之心此蓋伏遇某官模楷儒林澄清士類謂  
青芝赤箭曾為待用之資俾朽木枯株不假先容之助  
重垂收拾未忍棄捐某敢不增激懦衷勉承嘉惠謹寄  
學而行可力固怠於初心日有益而月有功庶圖於來

效

謝提舉舉陞陟啓

驚劣奚堪方竊卿雲之庇鴻私所逮遽叨華袞之褒捧  
檄為榮撫躬增愧惟邦家之致治莫大於薦延眷士夫  
之求伸必資乎汲引管仲得志實由鮑叔之知龔勝顯  
名終藉何侯之力拔茅連茹者多矣彈冠結綬者有之  
然人實難知紛賢愚之並進况士既自售久廉恥之莫  
興或借勢於諸公之先或掠美於衆人之後或務一切

以追時好或拂百姓以為己功或便僻諧媚以干左右之容或趙趙囁嚅以伏聲效之側未有不求而得者豈聞無因而至哉倘默然在稠衆之中而介如丘攀援之助執手以上遠冀古人之風傾蓋而交無復下僚之歎靜言斯道每謂難能敢自意於妄庸迺辱知於特達如某者受資至陋涉道甚疎器僅類於斗筲材莫殊於樸檄徒誦詩書之明訓粗聞仁義之大方射策明庭抗塵末路栖遲五斗俯仰十年在有道而賤貧固賢者之所

心如不義而富貴亦君子之弗為每貽強項之譏聊欲  
伸眉於後比隨常牒依迹外臺效刀筆之小勞初無善  
狀興山川之大利又之奇功方期罪罟之逃敢冀薦書  
之上此蓋伏遇某官孤風邁往雅量鎮浮廣內恕以及  
人推深誠而與下瞻溝中之斷雖無取於棟梁聽爨下  
之桐或有中於律呂遂俾易忘之賤亦蒙遴選之榮某  
敢不俯激懦衷仰承嘉惠潔已以進期異日之有成直道  
而行庶終身之寡過

謝判府薦舉啓

試吏屬城方懼曠凜之責登名奏牘誤承褒薦之私荷眷甚優循躬知愧惟本朝之成憲邈治古之高蹤並建官師旁求俊乂謹攷功能之實尤嚴保任之科將使涖渭分流薰蕕異器英豪無留滯之歎葺闢絕覬覦之心然而人之難知昔以為病潔己者蓋於自獻善官者巧於取容借權竊寵之人或得名於治辦畏法循理之吏或見謂以愚蠢自非明哲之公孰盡選掄之善如某者

知能謗薄衍業迂踈蚤承訓於義方粗服勤於世習區  
區射策碌碌效官錯節盤根曾未施於利器朽株枯木  
顧誰為之先容宜繫顧盼之餘遽有吹噓之及此蓋某  
官至誠與下雅量鎮浮校短量長端若持衡之審舉賢  
達吏藹然推轂之風務施及物之仁不間易忘之賤寢  
逾黼黻恩重丘山某敢不增激懦衷益堅素守鉛刀無  
用尚收一割之功駕馬忘疲終致千里之遠

謝知府薦舉啓

試吏屬城曾乏毫釐之效登名奏牘誤蒙黼黻之褒荷眷殊優循躬知愧國家旁求士類謹擇吏員在高位者既號為得賢任下僚者亦虞為曠職曲盡選擒之善孰逾保任之科將使涇渭分流薰蕕異器英豪無留滯之歎闡首絕覩覩之心况知人之甚難蓋自古之同患達觀所舉斯盡大臣之能稱匪其人實為明德之累如某者知能譖薄術業迂疎潔身無意於近名好古非期於詭衆區區肄業雖不廢於三餘碌碌效官固未聞於一

善拙於干進愚不適時惟期罪罟之逃敢冀薦書之上  
此蓋某官深誠與下雅量包荒務推擇於羣才不遺忘  
於小器聞善有同於已出舉能非以為私恩蕭何之多  
薦儒生鄭莊之好言長者故茲收采誤逮辱微某敢不  
益自激昂勉思報稱登龍門以親德既遂於初心附驥  
尾以顯名更期於異日

發解謝試官啓

詞場較藝初無語上之才貢牒第名偶與在中之列靜

言未冒徒切凌兢竊以崇經術者不特右文立邦家者  
本於得士在昔長育之道惟時賓興之方自文武而已  
隆至成康而大備嚴四術而立教糾八刑以防姦道德  
馨聞旋登司徒之版才能秀出隨錄鄉老之書時無滯  
才朝盡公舉菁莪微物在阿陵而獲生棫樸小材為薪  
槱而有用可謂盛矣何以加諸世德下哀餘澤浸息三  
皇五帝之道鬱而不興諸子百家之書蕩而無法茲風  
既煽厥獎彌深惟我宋之勃興追成周而繼作仁祖名

八人而賜坐推廣上庠神考任一相以經邦肇新三舍  
建上聖之纂業先學校以廣聲辟雍大闢於國南泮水  
徧布於天下既優給其廩餼復衆建以師儒鳶飛雲翔  
魚躍川泳訓迪經旨開明士心俾藹藹之吉人有德有  
造致濟濟之多士來游來歌煥乎成文炳然於夔講成  
均之良法停科舉之舊章念將發策於此時猶有焚舟  
之一戰然而漕臺雄觀羣俊會奔楊王盧駱之才許史  
金張之胄應試者幾一百輩中選者不三十人顧此精

求豈容濫處如某者。耨文有志未墨無功。類童子之難言。非後生之可畏。徒以家傳鉛槧。世紹箕裘。磨礪於斷簡殘編。漸漬於前言往行。雖云未達。豈曰無知。幸遇休明。勉應詔令。刻鴻鵠鷺。始誦伏波之言。誤墨成蠅。何異不興之畫。得踰望外。愧溢顏間。此蓋伏遇某官大雅。兼容至誠。樂育作斯文之龜鑑。妍醜自呈。為吾道之權衡。重輕隨應。得寸長而必取。惜片善之或遺。假以舟航。俾獲善濟。傳之羽翼。期遂橫飛。致此空疎。亦被收採。實雖

稱於公選私自揣其過情某敢不淬厲壯心激昂素志  
十駕而致千里不後驛騮一釣而連六鼈更窮渤海過  
此以往未知所裁

代右丞謝太宰啓

欽承明綺叙進中臺念積愧以無容終罕辭之不獲竊  
以貳丞並位雖云分職之均然而九牧具瞻豈曰次遷  
之地不特專樞憲之重將使毗鼎輔之隆朝夕論思克  
左右於厥辟夙夜出納用敷錫於庶民惟報稱之甚難

故褒延之尤謹伏念某學慚洽決識昧幾微獲依日月  
之光浸被雲天之澤入陪四近坐閱三冬何裨稷契之  
謀莫踰戴劉之美稽其已試久負空殫寵以不貲復叨  
誤選此蓋某官道嗣前哲德冠生民下遂萬物之宜獨  
兼三公之事見善如己因求備於一夫報國以人方共  
熙於百志曲借揄揚之賜密形啓沃之餘遂俾愚衷亦  
膺睿獎某敢不懋昭攸訓祇率厥常不命其承益厲匪  
躬之節尚迪有祿庶恢作人之風

代平定到任謝宰相啓

投閒置散久懷竊祿之羞臨衆處官復冒承流之寄被恩浸厚省已奚堪惟上聖之端臨當羣賢之拱輔道豐仁洽屢頒寬大之書訟理政平並協中和之化凡千里之師帥必一時之良能如某者知類擧瓶才非脫穎雖少竊鄉曲之譽而長無左右之容以直鍼而為鈞顧何求之何得不量鑿而正枘宜所向之多艱存膺直館之優漸卜歸田之計會例從於汰斥益自歎於羈窮此蓋

伏遇某官德冠生民道嗣前哲變調元化覆冒羣生操  
方任能因短長於鳬鶴循名責實付輕重於權衡遂令  
哀朽之餘亦預選擇之末某敢不好是正直居以廉平  
仰布德音盡究款密丁寧少旨俯求民瘼俾銷歎息愁  
恨之心

代余帥到任謝執政啓

叨奉宸恩出分郡政首宣詔令下慰黎元眷此東藩實  
稱巨屏隱若金湯之固旁連海岱之雄太公始封務行

平易之化曹參為相亦隆清淨之風將往哲之是希顧  
薄材之難強仰依洪造或賜曲全伏惟某官遠略經邦  
深誠許國明於王事之體通於時用之宜端委廟堂謀  
謨惟幄大均挾北方咸遂於羣生廈屋帡幪願永依於  
巨庇其於欣幸曷既敷宣

代方閭到任謝執政啓

銜命朔方未遑暖席備員東道復玷除書祇服寵靈俯  
增悚懼惟齊魯之奧境有孔孟之遺風方國家明道德之

原而郡縣謹庠序之教義冠博帶競進於賢闡揭節來  
軺寵分於使指宜資德器以重儒林如某者亡所取材  
粗知向道但守經而據古恥曲學以阿時蚤從推擇之  
私荐誤使令之末往來數路首尾八年徒驚齒髮之侵  
莫著涓埃之效豈期明詔還昇故棲激濁揚清吏民素  
知其志尚厲精向道士子亦安於教條庶幾屢試之愚  
或有一得之補此蓋某官望隆柱石勲著鼎彝端委廟  
堂儀型百辟謀謨帷幄燮和萬邦務廣任於羣才不遐

遺於小器致茲疲劣亦被寵光策蹇磨鉛誓服勤於官  
守彈冠結綬期終託於已知

代沈和仲除直秘閣賜紫謝執政啓

書林寶祕既假美名命服光華更叨藩錫撫循榮幸跔  
躋輶慙恭惟國家推右文之化迺眷圖籍盛中禁之儲  
倬彼東壁之躉煥乎羣玉之府故前史著藏室蓬萊之  
號而異時建石渠天祿之名博求英俊之流裒進儒雅  
之士是謂國家育材之高選豈特搢紳稽古之至榮一

職其間四方所仰如某者才非游刃知類挈瓶枕經籍書竊嘗有志彈冠結綬徒幸逢時夤緣推選之私浸誤使令之末頃辭華省出領外臺足食足兵雖暫紓於邊計餘財餘力蓋悲稟於廟謨方魏闕以馳誠俄甘泉之入覲宸光咫尺極陳翼翼之思天語溫純爰納斷斷之介繼被出綸之詔載須在笥之衣褰賈琮之帷裳已聳觀於民吏陳桓榮之車服方欹艷於士夫顧寵數之甚優曾疲駕之敢冀此蓋某官清廟瑚璉大廈棟梁

擴帝紘而恢皇綱建萬世之長策謀王體而斷國論為  
一代之宗臣

下闋

代沈和仲河賞轉官謝執政啓

佐三山之成績初乏微功領一札之恩書忽叨進秩闕  
然自視惕若增羞伏念其性本愚忠才非巧宦乘軺建  
節方出領於邊儲造舟為梁莫預聞於廷議徒藉羸餘  
於外府庶裨萬一於鳩工畚職分所當然奚勞能之可  
錄敢謂慶賜之下迺蒙褒陟之優拜命無從歸恩有自

此蓋某官謀謨帷帳端委廟堂勲著門彝望隆柱石不  
遐遺于小器務廣任於羣材顧如疲駕亦在甄獎某敢  
不仰遵明訓俯戒素飧知無不為倘効勤於盤錯釀於  
用賞願畢慮於陶鎔

代沈和仲謝王待制舉自代啓

綿力奚堪謬當清舉袞褒俯逮益愧顏歷觀隆古之  
時咸懋尚賢之典虞廷汲引九官濟濟以相先漢室薦  
延羣士洋洋而並出洪惟聖代並著成規簪筆持荷凡

膺近侍之除者拔茅連茹必推名輩而進之蓋將察其所安以盡大臣之能豈特選諸所表以為異日之用故非道合罔以名聞如某者賦性愚蠢才冗散少而涉獵莫窮游夏之淵源長則宦游居之求賜之蓬蓽出入屢更於粗使遭逢自結於上知公爾忘私勤於補過長孺之憇甚矣夷吾之器小哉惟虞衆指之排擠敢意當塗之推轂此蓋某官模楷多士羽儀本朝才尤長於治民文最宜於為誥久相待而遠相致羞同勢利之交觀其

行而聽其言務求亮直之友遂俾無聞之陋亦蒙有味  
之言某敢不俯激懦衷仰承嘉惠王陽在位願希貢禹  
之彈冠陳平雖竒終從魏倩而驂乘

代鮑欽止謝洪帥啓

臨衆處官居之治民之效奉令承教幸逃失職之誅夫  
何過情迺辱清舉竊以報國之大者莫如推賢而進之  
矧當綜核之朝尤重薦延之選如有所譽以觀大臣之  
能苟非其人斯為明德之累如某者身遠與寡意廣才

疎雖經學行能莫足算錄然姓名狀貌微簡聖明固嘗  
獵居於俊游每輒見擢於吏議流落不偶久自分於投  
閒約結亡奇顧奚堪於假守尚依巨陰少植枯根豈繫  
華袞之榮猶軫綿袍之戀此蓋某官望隆人傑德冠儒  
先邁鄭莊之成名本於推轂念王陽之在位宜有彈冠  
收其一日之長借以片言之重得踰所望愧溢於顏噓  
枯吹生有如此者拉朽磨鈍何以報之誓殫十駕之勤  
更試一割之用

代謝崔帥薦陞陟啓

小吏淺聞曾微善狀大賢容衆猥借餘光雖於溢美之榮實負過情之愧眷聖神之制治方英俊之並游欲野無遺賢必資乎汲引惟舉不失德迺副於揄揚故凡劄牘以進焉皆其脫穎而出者矧位隆於從橐而望聳於師垣昧昧或加價已增於數倍吹噓所暨律驟變於三春豈圖特達之知亦及憲庸之輩如其者撲邀不足數約結固亡竒生值熙宸未嘗學軍旅之事少承世澤幸

得免耕獲之勤射策明庭抗塵末路詩書禮樂之際已  
負初心簿書期會之間浸成俗吏聊固守以靜俟不抑  
操而苟容方懼衆咻亟罹罪罟豈期多可俾預薦書此  
蓋某官盛德應時深誠接物君子之見善如己大臣之  
報國以人舍短取長務推隆於晚進拔十得五庶間獲  
於異時故雖甚愚未忍遐棄某敢不恪居官次砥礪廉  
隅惟仁義之可師誓堅素守辛歲時之未暮將為後圖

代謝運使少卿奏舉啓

攝官承乏初無片善之稱剝牘奏名誤辱一言之譽揆  
材勿稱被寵為榮竊以為政莫大於選賢報國無先於  
舉類文字垂聲於晉國本自知人鄭莊發譽於漢庭實  
由推士惟本朝之置使俾分道以薦能營職奉公宜有  
佐時之循吏砥名礪行固多學古之名流敢意庸虛謬  
當簡拔其奮身寒苦涉世迂疎第知畏法以遵繩不善  
養交而持祿區區自效孰為左右之容斷斷無能曾之  
拔聯之勢退未諧於素志進有愧於明時方竊庇於餘

光庶少安於孤迹謹訶自懼薦寵何名此蓋某官恕以  
及人清而容物風義可隆於薄俗高明灼見於羣情校  
短論長靡責行能之備旁通多可曲垂汲引之私不間  
賤生亦叨遴選某敢不持循士檢恪謹官常策蹇磨鉛  
倘粗收於微效飲冰茹蘖誓無玷於殊恩

代余帥謝監司走馬啓

入陪國政嘗參東省之榮出領侯藩復冒鈴齋之重惟  
茲幸會獲庇仁明伏惟某官宇量宏通風猷邃遠雅望

素推於當世威名久著於列城顧慚哀朽之姿方竊藩宣之寄瞻風甚邇覩德未諳竚聞臨按之來庶奉誨言之末

代謝林彥振薦舉啓

庇身真館方愧素餐剗牘明庭誤承清舉受非其稱情靡自寧惟士之逢辰進必資於知己而臣之報國義莫重於得賢矧當綜核之朝尤謹薦延之寵苟非道合曷以名聞如某者生於寒鄉系則落譜樸檄莫足數約結

固無奇幸免耕獲之勤嘗聞俎豆之事奉法循理雖遵  
為治之方任職居官終乏踰人之舉老冉冉其將至情  
眷眷而懷歸稍親香火之緣不覺歲時之久求田問舍  
念無巖石之儲抑志忍尤坐竊斗升之祿迹其疲曳宜  
在謳訶敢意矜憐尚加拭此蓋某官望隆柱石勲著  
鼎彝為一代之蓍龜作萬邦之模楷謂拔十得五尚有  
補於明時故舍短取長或未忘於小器褒逾黼黻恩重  
丘山某敢不礪行砥名剗心養志方將拭目仰觀廈屋

之成願以微軀永托大鈞之播

代仲雅謝舉主啓

薄材難強每懷譴黜之憂厚德兼容更辱褒揚之賜戴  
恩甚寵省分知慚竊以為政莫大於得賢報國實先於  
推士益明敗晉公孫垂舉善之稱管仲相齊鮑叔擅知人  
之譽故雖等威之有間必資聲氣之相求世德下哀  
士風不競睥睨在上無周公吐哺之勤囁嚅於時多安  
仁望塵之辱取舍既成於市道窮通畢見於交情惟

我治朝參稽古制明賞罰之分嚴保住之科營職奉公  
宜得佐時之良吏砥名礪行固多學古之儒流顧簡拔  
之甚明豈庸虛之所覩如某者眷愚自信孤僻寡徒學  
經未明竊有歸耕之志為貧而仕寧辭擊柝之卑蹭蹬  
亨衢侵尋暮景沈迷簿領幾忘寢食之私顛倒夢魂  
未免過差之悔既乏毫釐之效曾無左右之容孰謂  
高明猥形論薦此蓋某官孤風邁往雅量包荒廣內  
恕以及人推至誠而與下謂溝中之斷雖無取於棟梁

而饗下之薪或有中於律呂遂使易忘之賤亦叨遴選  
之榮某敢不恪守官箴持循士檢歸恩有地知廈屋  
之帡幪擣物無私託大鈞之挾札永堅素守以畢餘生

代謝薦陞陟啓

攝官承之微善最之可稱剝牘奏名辱吹噓之誤及榮  
生望表愧集情涯竊以為政本於用賢報國莫如求善  
唐堯之先汲引則百工時而庶績凝漢武之重薦前才  
士慕而異人出仰際熙昌之運尤嚴保任之科既稽衆

以旁求必限員而遴選舉不失德於以知大臣之能稱  
匪其人亦或為明德之累矧位隆於從橐而望竦於儒  
林仲尼一字之褒榮於華袞季布一言之諾重於黃金  
宜得實材用充清選如某者挈瓶智小闢管識微早襲  
箕裘粗聞詩禮名嘗忝於論秀恩幸及於賞延學追言  
偃之淵源僅免面牆之謂政匪冉求之達藝殊慚製錦  
之傷職忝乘田功疎委吏寧抗塵而走俗慙枉尺而直  
尋蓋有道而賤貧固昔人之所恥如不義而富貴亦君

子之弗為迹雖愈窮志方益壯異潘安之巧宦同長卿  
之倦游邈矣青雲但作退飛之鷁忽焉白日徒瞻過隙  
之駒自嗟衆目之憐誰復引手而救方念歸休於南畝  
尚繫竊食於太倉唯罪罟之是逃曾薦書之敢覩他時  
毛遂未出趙勝之錐囊此日行沖得備仁傑之藥籠此  
蓋某官泰山北斗皆仰其高璞玉渾金莫名其妙稱量  
吾道領袖斯文恕以及人清而容物鄭當時之推轂有  
味其言張安世之提衡不望其報收文琴於爨下取犧

尊於溝中致此疲駕亦蒙獎拔某敢不三省自誓千慮  
殫愚尺鯉隨波既預龍門之集青蠅附翼終從驥尾之  
遊



忠肅集卷中